



Studiadenn diabarzh Disoc'hoù ha dielfenniñ

Taolenn

| | |
|--|----|
| Pennad-digoriñ | 1 |
| Ar respontourion | 2 |
| Gwazed ha maouezed | 2 |
| O oad | 2 |
| Kumun-annez | 3 |
| Bugale d'an izili | 4 |
| Petra a ra an dud er Gerlenn ? | 5 |
| Ar skol-noz | 5 |
| Traoù arall | 7 |
| C'hoantoù | 8 |
| Prizadur ar servijoù ha produioù | 9 |
| Ar servijoù | 9 |
| Ar produioù | 10 |
| An Dason | 11 |
| C'hwi hag ar gevredigezh | 12 |
| Ar prizioù | 12 |
| Ampartiz ha darempredoù | 14 |
| Tud arall | 14 |
| Pennad-kloziñ | 15 |

Pennad-digoriñ

Èl displeget deoc'h a-raok ar goulennoù graet geneoc'h daou vlez hanter zo (betak deroù 2011), pal an enklask diabarzh-se a oa gouiet hag-eñ e c'helle ar servij rentet get ar Gerlenn bout « kempouezet » a-fet argant, kar àr zigresk eh ae ar yalc'hadoù evit hor post, ha fonnapl memp ! A-c'houde eo aet àr-raok raktres un ti ar vro evit yezh hag sevenadur Breizh e bro an Alre ha krouet e vo ez-ofisiel ar framm nevez e miz Genver 2013. Treuzkaset e vo ar post-labour dezhoñ.

Asuriñ a ra ar framm-se ma vo dalc'het get ar post... betak ur serten poent. A-drugarez dezhoñ e vo serret argant get razh ar c'humunioù tolpet ennoñ hag ul lodenn a c'helle argantaouiñ ar post gouestlet d'ar yezh. Da zilennidi ar Gerlenn e vo atav neoazh da glask an argant a vanko a vlez da vlez evit peurbaeiñ ar garg-se.


Poent bras e oa eta klask gouiet piv eo izili ar Gerlenn, penaos e kavont ar servijoù, ar monet en-dro, an darempredoù 'ba'r gevredigezh, ha petra a vank dezhe. Ul lodenn vat ag an disoc'hoù a oa bet kinniget dija en emvod-meur diwezhañ. Ni 'glasko amañ da heul displeg deoc'h muioc'h dre ar munudoù pesort respontoù a za àr-wel diàr an enklask-mañ. Spi hon eus e vo talvoudus ar sort sell doc'h hon kevredigezh, daoust ma ne chañcho ket marse kalz a dra doc'htu-kaer.

Degasomp d'ho soñj ivez o doa chañchet meur a dra dija a-c'houde an enklask : a) ur spas niverel labour (ENT, evit *espace numérique de travail*) zo bet savet àrlene ; b) bihanaet e oa an niver a stajoù « Gober e brezhoneg » ; c) n'eus ket bet kazimant filaj erbet e 2011-2012 ; d) an DVD-Rom *Daet eo genin*, da sikour labourat àr ar c'hompren dre glevet, zo daet er-maez ; e) gwellaet eo bet *An Dasson* ; f) ul lec'hienn nevez a vo digor a-benn nebeut...

Ar respontourion

43 respont hon eus resevet, da lâret eo a-boan 31,4 % ag ar gevredigezh, ma keñveriomp get an niver a izili e 2010-2011. (Ne c'helle ket respont nemet ar re o doa emezelet araok ar blezad-skol diwezhañ-se, avat, anat deoc'h.) N'eo ket kalz. Met gwelet a reoc'h eh seblanta ar standilhon roiñ deomp ur skeudenn feal awalc'h ag ar gevredigezh a-bezh.


Gwazed ha maouezed



44,19 % ag ar respontourion oa maouezed anezhe, 55,81 % gwazed. Kement hag e-mesk hollad an izili, hrezvez sifroù ar blezad 2010-2011 atav : 44,53 % ag ar re gentañ ha 55,47 % ag ar re arall.


O oad

Setu an dasparzh dre rummad oad :



Merkiñ a reer penaos emañ an dud etre 45 ha 55 blez ar re niverusañ, heuliet get ar rummad 55-65 blez, get ar rummad 35-45 blez hag ar mump niver a dud yaouank (25-35 blez) ha kozh (oc'hpenn da 65 blez). Un doare arall da welet an traoù : 72,09 % ag an izili o dehe en tu arall da 45 blez. N'eo ket yaouank hon kevredigezh eta, met yaouankoc'h ur sort evit hollad ar vrezhonegourion.


Kumun-anez



Èl ma vo sklaer diàr ar skeudenn-mañ e ta an darn vrasañ ag ar respontourion ag an Alre, a Vrec'h ha goude a Bleuwigner ha Lokmaria-Kaer. Souezhusoc'h marse : kement a respontoù hon eus resevet a Wened. Goude e ta Arradon hag an Oriant, div gumun c'hoazh er-maez a vro an Alre, ha div gumun arall a Vro an Alre : Santez-Anna-Wened ha Pluergad, araok Lokoal-Kamorzh hag ur bochad kumunioù arall, get un den en deus respontet e pep hani, moarvat.

Ma keñveriompe bremañ get ar gartenn diazezet àr an izili er blezad 2010-2011 e ta c'hoazh tamm pe damm ar mump urzh : an Alre, Brec'h, Pleuwigner, Lokmaria-Kaer ha Pluergad a gas muioc'h evit eizh ezel d'ar Gerlenn ; Kamorzh, Pluneret, Karnag, Baden ha Gwened etre 5 ha 7.


Origine des adhérents du cercle Sten Kidna



Nombre d'adhérent par commune

- Aucun adhérent
- 1 à 2
- 3 à 4
- 5 à 7
- 8 et plus

Périmètre du Pays d'Auray



Echelle: 1:450 000

Réalisation : Syndicat mixte du Pays d'Auray, VR - mars 2011
Source : Cercle Sten Kidna, ©IGN Paris - BD_Carto© 2010

Bugale d'an izili

E-mesk ar 43 respontour, 27 o deus lâret o doa bugale. E-mesk ar re-se :

- 10 a lâr emaint e hentennoù divyezhek ;

- 6 a lâr o deus bet un tañva d'ar brezhoneg ;
- 3 a lâr e vehent intereset.


Ne seblanta ket bout neuze e-mesk bugale ar respontourion e klaskimp izili nevez da ziorren ar gevredigezh. Arabat ankouaat neoazh e ta ur bochad bugale, ha sur a-walc'h ar re a zo kaoz anezhe amañ en o mesk mard int en oad-skol, d'ober traoù er Gerlenn : kinkladurioù Nedeleg, jiboesat uioù-Pask h. c'h. Leun eo bet ar sal meur a wezh evit degouezhioù a sort-se. Pouezus int evit o lakaat d'implijout ar brezhoneg er-maez ag ar skolioù hag o roiñ c'hoant d'ober get ar yezh diwezhatoc'h, ha perak pas da zonet d'ober traoù kinniget get ar Gerlenn pa vint daet bras !

Petra a ra an dud er Gerlenn ?

Ar skol-noz


5 % ag ar respontourion hepken ne gemeront ket perzh e servij pouezusañ ar Gerlenn, da lâret eo ar skol-noz. Ha 2,50 % a gemer perzh e meur a gentel (hep kontiñ ar vonitourion a gas meur a hani).

Ur c'hard ag an dud a soñj dezhe o deus tizhet al live A2. 22,50 % a zisklêria bout deraouidi get al live A1 ha niverus e ta goude ar re o deus tizhet al live C1. 10 % ag ar respontourion ne ouiont ket pe live o deus e brezhoneg.



Un trede gwezh, an hani diwezhañ (pe dost), hon eus tro da geñveriiñ get titouroù ar blezad 2010-2011 :


Liveoù 2010-2011



Kavout a reer ar mamp live A2 da gentañ-penn, hag hañval eo an daou a za da heul met en dizurzh (C1 hag A1 e-lec'h A1 hag C1). Get an trede keñveriadur-se e c'hellomp lâret e seblanta ar respontourion dileuriñ mat awalc'h ar gevredigezh a-bezh.

É troiñ en-dro da zisoc'hoù an enklask a-ziàr ar skol-noz emañ interesus gwelet e vehe intereset 41,86 % ag an dud get kentelioù d'an daou lamm. Ha setu o c'hinnigoù :

Pesort kentelioù d'an daou lamm




Ma lakaomp asamp ar re a vehe intereset get stajoù d'an dibenn-sizhun pe stajoù « un nebeud deizioù (2-3) », pe c'hoazh an hani en deus meneget « stajoù berr », e taont da vout an niverusañ : nav anezhe. C'hwec'h den a yahe pelloc'h : betek ur sizhuniad staj. Ha pevar a vehe laouen da vonet da meur a gentel bep sizhun.



Kompren a reer o dehe afer a zeskiñ fonnaplac'h pe en un doare efedusoc'h pa seller doc'h ar respontoù da heul.

Traoù arall

Gober e brezhoneg




Filajoù




Pa seller doc'h ar respontoù-se e remerker n'o deus ket graet kalz a draoù er-maez ag ar c'hentelioù-noz. 53,70 % well-wazh n'o deus ket james kemeret perzh en unan ag an degouezhioù aozet get ar Gerlenn. Netra da damall dezhe, èl rezon ! Interesusoc'h eo klask gouiet perak. Hag aze e ta an abeg ken gortozet ha mamp doujet doc'htoñ get kement a aozerion degouezhioù pe merourion kevredigezhioù : an diouder a amzer.

Perak ne za ket an dud



N'hell ket hon kevredigezh roñ amzer d'an dud, siwazh, na gober àr-dro o familh, na gober o labour en o flas, nag o mirout d'ober traoù arall... Gall a ra avat klask uhelaat o live brezhonek, he fal kentañ eo, ha marse ivez kavout an tro(ioù) da roñ fiziañs d'an dud enne o-unan, evit ar pezh a denn d'ar brezhoneg atav. Stajoù d'an daoulamm a c'hellehe bout ur feson d'ober, an DVD ur feson arall. Mat 'vehe en em soñjal eta àr ar penaos lakaat an dud d'implijout ar brezhoneg er-maez ag ar c'hentelioù. Gall a rahemp marse ivez kavout un tu da lakaat deiziadoù hag eurioù a zedenne muioc'h a dud, ma n'int ket ar re a reomp dija gete, èl rezon.

Aze o deus degaset ar respontoù da heul anzavioù un diskoulm, p'o deus respontet 11 den e sikourhe gete kemer perzh en degouezhioù-se ma vehent graet e plas ur gentel ur wezh an amzer. 10 den arall o deus respontet ne oa netra d'ober. Pa n'heller ket, n'heller ket ! Ha pa ne venner ket naket.



C'hoantoù

Daou c'houlenn diwezhañ ar pennad-se a venne d'anavout c'hoantoù an dud. Setu amañ roll ar respontoù bet resevet :

- Keginiñ (krampouezh, katev...) : 7 gwezh d'an nebeutañ
- C'hoariva (2 wezh)
- Darvoudoù a ro da glevet ar yezh en ur feson modern en ur ziskouezh pinvidigezh ar yezh a zu-mañ
- Dastum
- Emgavioù get brezhonegourion
- Emvodoù get tud ag ur memes live
- Eskemmoù dre Internet (lec'hienn ha listenn) > doareioù, testenioù...
- Gallout komz plaen er Gerlenn, un deiz arall hag ar sadorn (degasomp da soñj emañ posubl dija d'ar gwener d'enderv)
- Gouiet posteloù moniterion ha keñsorted kentel
- Kan, deskiñ dansoù Breizh
- Kinnig stalioù, filajoù, troiadioù-bale da dud get bugale
- Muioc'h a labour d'ober er ger, muioc'h a labour ar ar skriv, poelladennoù
- Prezegenoù a-zivout istoer Breizh hag ar brezhoneg
- Prezegenoù ar ar sevenadur
- Sport (kayak, kanoe, h. c'h.)
- Stal skriviñ
- Kegin ha sevenadur Breizh (hengounioù, troioù-lavar, gizioù, h. c'h.)
- Jardrin, kanoe e milin Treou, c'hoarioù Breizh evit ar vugale hag o zud, stalioù lenn istoerioù e brezhoneg, filajoù etre-rummad
- Liorzh, brikoliñ (munuzerezh, masonerezh...)
- Rallye e brezhoneg e bro an Alre, dañs
- Degouezhioù sport, kenstrivadeg krennlavarioù, stajoù lediñ ar skiantoù, stummadur ar ar c'hlad, distagerezh varzhoniezh, c'hoariva er straedoù
- Skrivadenn bep tri miz ha prezegenoù bep tri miz get an deskidi
- Jubennouriezh
- Tañva gwin, bizitiñ tiegezhioù istrek h. c'h. (èl e Silfiég)
- Troioù-bale e kêr pe er maezoù 1) da sonnaat ar bezhoneg ha 2) en diskouezh
- Razh an traoù kinniget er goulenn (!)

Ne vanka ket ar soñjoù mat, neuze ! Penaos gober evit aesaat aozadur ar sort degouezhioù ? É lakaat an dud o unan da gemer e karg aozañ an degouezh-mañ-degouezh 'barzh framm ar gevredigezh ?

Prizadur ar servijoù ha produioù

C'hoant hor boa ivez gouiet penaos gwellaat ar servijoù a ginnig ar Gerlenn. Servijoù amañ a dalv ar pezh a vez roet d'an izili oc'hpenn ar produioù. Ar re-mañ zo razh an traoù gwerzhet get ar Gerlenn : ar c'hentelioù-noz, ar stalioù-labour « gober e brezhoneg » pe ar c'hluboù (ar c'hlub-soniñ e gwirionez), an degouezhioù a bep sort (filajoù, « Kanomp asimpl », h. c'h.). Ar CDioù ha DVDioù hag ar gelaouenn *An Dasson* hon eus roet da briziñ goude.

Ar servijoù

Petra a rohe deoc'h ar Gerlenn, emezit-c'hwï ? Sellit doc'h an daolenn da heul :

| Servij | Soñj erbet | Fall | Dipitus | Mat awalc'h | Mat | Mat-tre |
|--|------------|------|---------|-------------|-----|---------|
| Bruderezh àr oberiantizoù ha produioù ar gevredigezh | | | | 4 | 23 | 14 |
| | | | | | | |
| Bruderezh àr traoù a denn d'ar brezhoneg er-maez ag ar gevredigezh (stajoù, festoù, h. c'h.) | 1 | 1 | | 10 | 19 | 10 |
| | | | | | | |
| Kalite an darempredoù izili/goprad, monitourion, izili ar c'huzul-meriñ | 2 | | | 3 | 14 | 22 |
| | | | | | | |
| Monet en-dro ar gevredigezh (emvod-meur, h. c'h.) | 10 | | | 5 | 13 | 13 |
| | | | | | | |
| Degemer er sal | 5 | | | 8 | 10 | 18 |
| | | | | | | |
| Degemer dre bellgomz pe bostel | 10 | | | 1 | 12 | 18 |
| | | | | | | |
| Mererezh ar blog | 17 | | | 3 | 13 | 8 |
| | | | | | | |

Gwelet a reer penaos emañ prizet mat-tre, dre vras, ar servijoù-se.


Ar blog a za get an notenn izelañ, surtout kar n'o deus ket ar muiañ niver soñj erbet àrnoñ. Unan en deus mamp skrivet goude : « Ur blog zo ? ». Dav eo lâret ur sort e oa bet prizet bras get unan ag ar respontourioù ar videoioù, ur brezegenn hag ar c'hontadennoù bet lakaet àrnoñ. Tud arall o deus skrivet e vehe mat brudiñ ar blog muioc'h é lakaat ul liamm e traoñ pep postel kaset get ar Gerlenn hag unan en deus goulennet ur gwir lec'hienn. Àr ar poent-se e c'hellomp lâret en deus gwellaet ar servij dija, get al lec'hienn www.kerlenn-sten-kidna.com bet savet get Olivier, da heul ur stummadur a-ratozh. Lakaet e vo neuze al liamm e pep lec'h.

Ar mamp notenn uhelañ zo bet roet d'ar vruderezh àr oberiantizoù ha produioù ar Gerlenn ha da galite an darempredoù etre an izili hag ar goprad, ar vonitourion pe izili ar c'huzul-meriñ. Kompren a reer an notenn gentañ pa seller doc'h ar respontoù d'ar goulenn : « Ha degouezhet eo deoc'h bout klevet ag un dra goude dezhoñ bout degouezhet ? ». 76 % o deus respontet ne oa ket bet c'hoarvezet james dezhe ha 18 % ur wezh. Evit an eil poent e oa bet skrivet get un den e oa bet degemeret mat-tre da gentelioù zo ha fall d'unan arall. Gall a ra bout lorc'h ennomp dre vras da vout darempredoù a galite 'barzh hon kevredigezh.

Chalusoc'h e c'heller kavout an niver a dud (10) ha n'o deus ket soñj erbet àr monet en-dro ar Gerlenn. Gall a ra bout kar ne daont ket d'an emvod-meur, an degouezh nemetañ a sort-se, gouestlet penn-da-benn d'ar monet en-dro. N'hor boa ket meneget traoù arall hag a denn d'ar monet en-dro er goulennaoueg. Gallet hon dije degas soñj a draoù resisoc'h, èl an doare da votiñ en emvod-meur, lakaomp, kar diaes eo lâret e-kreiz an degouezh-se e kavher gwell ur voterezh guzh. Un den a gav

domaj ne vehe ket graet an emvod-meur hag ar c'huzul-meriñ divyezhekoc'h get sikour ar jubenniñ, èl ma vez graet get kevredigezhioù arall. Ne vehe ket fall atav brudiñ un tamm muioc'h an doare ma vez graet al labour evit kas ar gevredigezh en-dro : mod-se e vehe prizet c'hoazh muioc'h marse ar pezh a vez kinniget ingal d'an izili, get ul labour didrouz ha diwel, na bout m'emañ ponner ur sort evit lod ag izili ar c'huzul-meriñ.

Ha setu amañ dindan penaos e kav gwell ar respontourion bout kelaouet get ar Gerlenn :



Ma lakaomp asimpl al listenn, ar blog hag al lec'hienn e ta ar c'helaouiñ dre Internet pell araok (50 respont) ar c'heleier roet dre gomz get ar vonitourion pe tud arall (16) hag ar c'halañder paper (9). Dav eo lâret e oa moaien dibab meur a respont.

Ar produioù

Mat eo dre vras ar prizadur-se met get nebeud-tre a respontoù e gwirionez. Souezh erbet da gaout : gwelet hon eus uheloc'h n'o doa ket kemeret perzh kalz a dud en degouezhioù kinniget. Seul heverkoc'h a-se emañ an notennoù gwellañ a za get ar skol-noz hag ar filajoù, an daou dra prizet get ar muiañ a dud.

| Produioù | Soñj erbet | Fall | Dipitus | Mat awalc'h | Mat | Mat-tre |
|--------------------|------------|------|---------|-------------|-----|---------|
| Skol-noz | 3 | | | | 11 | 26 |
| | | | | | | |
| Gober e brezhoneg | 27 | | | 1 | 6 | 5 |
| | | | | | | |
| Filajoù | 1 | | | 1 | 10 | 7 |
| | | | | | | |
| Kluboù | 26 | | | | 9 | 4 |
| | | | | | | |
| Produioù (CD, DVD) | 24 | | | 1 | 9 | 6 |
| | | | | | | |

Diàr an traoù bet skrivet get ar respontourion e c'heller tenniñ an alioù da heul :

- Mat e kavont ar skol-noz dre vras, daoust ma kav unan diaes da dremen ag al live daou d'an trede.

- An abadennoù « gober e brezhoneg » a vehe da wellaat, hrevez unan (ha ne lâr ket penaos), hag unan arall en deus klevet re a c'halleg a-barzh. Ar mamp den en deus keuz ma vehe graet abadennoù ar c'hlub-soniñ e galleg.
- Un den a lâr bout bet dic'houstet ag ar filajoù kar ne oa « na blijadur na joaiusted e-mesk an dud » hag unan arall a gav getoñ ivez e vehe afer ag ur c'hwezh nevez enne, get troioù da lakaat an deskarded 'ba'r jeu.
- Unan a gav ponner ar feson da breniñ ar CDioù ha DVDioù (dav eo o goulenn araok ma vehent engravet).

Setu neuze traoù da wellaat àr an dachenn-se.

Àr ar poent diwezhañ-mañ (ar CDioù ha DVDioù) hon eus bet an disoc'hoù da heul :

- 65,15 % ag ar respontourion a ouia eh eus CDioù ha DVDioù graet get ar Gerlenn hag a c'hellont preniñ. Chom a ra 34,88 % na ouient ket, ur sort. (Pe n'o deus ket kemeret ar boan da lakaat ur groaz er c'harrez mat, met un afer arall eo !)
- 34,88 % (c'hoazh) o deus prenet ar sort produioù geneomp. (N'eo ket ar mamp re neuze, anat deoc'h !) Ar re bet meneget al liesañ : *Chom bev e brezhoneg* ha *Kanomp Asamp* peder gwezh pep unan, *Rodellig Aour* ur wezh.
- 61,90 % a zisklêria bout intereset.
- 26,83 % hepken a lâr e c'hellehe ar Gerlenn kinnig produioù arall, met soñjoù e-leizh en deus ar c'hard-se ag ar respontourion. Lod anezhe a denn tamm pe damm d'ar raktres DVD a zo àr ar stern hag a vo embannet e 2012. Met peurvuiañ e faot d'an dud kaout danvez d'o sikour get ar c'hentelioù (levrioù hag a heulhe al liveoù hag ar c'hentelioù), a-wezhoù e venegont oc'hpenn an divyezhegezh. Lod a vehe kontant oc'hpenn get danvez son pe filmoùigoù (ar re bet graet get Daniel Carré, lakaomp) àr CDioù pe DVDioù.

Ha gall a reomp lâret amañ o deus ur bochad soñjoù arall tud hag a zo 'barzh ar c'huzul-meriñ ! Dav vo deomp eta kavout an tu da ouiet pesort produioù a ray ar muiañ a verzh araok o lañsiñ. An DVD a vo un taol-ansae er c'heñver-se ha spi en deus ar skipailh e plijo deoc'h !

An Dason

Koumanantet eo muioc'h ag hanter ar respontourion (53,49 %, da lâret un tammig nebeutoc'h ag an izili dre vras er blezad 2010-2011, pa oa koumanantet 56,93 %).

Ar re n'int ket a ro meur a abeg : an diouder a amzer evit tri anezhe, unan é lakaat oc'hpenn an diouder a c'hoant, hag unan arall an diouder a argant. Tri c'hoazh a gav gete emañ re verr o brezhoneg. Daou ne ouient ket e oa ag ar gelaouenn. Unan a lenn ar gelaouenn e mediaoueg Brec'h, unan arall zo koumanantet da Ya, hag an hani diwezhañ a gav kalite ha danvez ar pennadoù diblaen.

Al lennourion a gav mat ar gelaouenn, dre vras : « mat » (5), « mat-tre » (4), « a-feson » (3), « interesus » (3), « diverrus », « fiskal », « ag ar choej »... Tri o deus skrivet pegen pouezus eo dezhe divyezhegezh ar gelaouenn. Unan en deus skrivet e oa « a-feson, memes evit an deraouidi », ar c'hontrol-mik doc'h unan arall a ne oa ket koumanantet a-gaoz d'al « live re uhel evit an deraouidi ».

Met n'hon eus ket bet 'met meuleudi, kar goût a ouia hol lennourion burutellat ivez. Mod-se e oa bet skrivet e veze uioù-koukoug pe farioù e brezhoneg ha ne oa ket trawalc'h a draoù e brezhoneg. Unan a gav ar gelaouenn « diaes da gompren ha fall ginniget » hag a vank dezhoñ (pe dezhi) ivez ur sikour àr ar gerioaeg. Un den a gavhe gwell bout un tem hepken dre niverenn hag un nebeud pajennoù a dennhe da zoareioù ar Gerlenn, unan arall a vehe kontant da gavout muioc'h a dresadennoù a-barzh. Ha meur a unan en deus lâret e vanke niverennoù.


Goût a ra ar skipailh e c'hell mankout niverennoù da goumanantourion zo a-gaoz d'ar chañchamant niver a gelaouennoù embannet bep blez. Klasket 'vo neuze edan berr diluziñ an afer-se evit aesaat ar c'houmanantoù da zonet c'hoazh.

C'hoantoù o deus c'hoazh al lennourion. Setu ar pezh hon eus lennet 'ba'r respontoù hag hon eus klasket urzhiiñ un tamm :


- rubrikoù nevez : c'hoarioù (3), istoerioù (2), kontadennoù, ar glad lec'hel (savadurioù pe natur), buhez pemdeziek, muioc'h a sevenadur hag istoer, soñj al lennourion ;
- doareioù : doareioù bro an Alre, bruderezh ar pezh a vez savet e brezhoneg (2) ;

- ar yezh : ar glad dre gomz, fichenoù àr deknikoù kozh pe a-vremañ get ar geriaoueg anezhe, troioù-lavar, poentoù yezh, brezhoneg Bro Gwened ;
- sikour da lenn : sikour àr ar geriaoueg, live yezh ar pennadoù ;
- astenn d'ar gelaouenn : enrolladennoù ar pennadoù-skrid e brezhoneg.

Dereat eo priz ar gelaouenn, a gav d'ar muiañ niver :



Ha re uhel e vehe kavet evit daou niverenn bep blez adal 15 pe 20 € :




C'hwi hag ar gevredigezh


Ar prizioù

Dereat e gav ar respontourion prizioù ar skodenn hag ar blezad-skol èl ma tiskouez splann ar skeudennoù-mañ :

Skodenn




Priz ar blezad-skol




Re uhel e vehe kavet an hani gentañ adal 50 € evit ar muiañ niver, met ivez evit ul lodenn vat anezhe adal 40 € :

Re uhel ar skodenn adal...



Evit ar blezad-skol ne oa ket bet splann hor goulenn, kar meneget hor boa priz ar blezad (50 €) ha lakaet oc'hpenn ar skodenn, ar pezh a save da 80 € en holl, met kinniget hor boa ur sort e c'helle bout re uhel ar priz adal 60 €. Setu atav disoc'hoù ar goulenn-se :

Re uhel ar blezad-skol adal...



Gall a raomp remerkiñ e oa ket bet kavet re uhel ar priz a c'hellehe bout goulennet evit ar servij a ginnigomp ar aok an 200 € get razh ar respontourion. Èl m'ho peus gwelet dija, moarvat, e oa bet kresket c'hoazh ar priz ar blez-mañ. Dav eo deomp lâret emañ hor skol-noz e-mesk ar re varc'hadmatañ e Breizh a-bezh, ma n'eo ket ar varc'hadmatañ. Tamm-ha-tamm eta e tostaimp d'ar priz goulennet get ar re arall, paneve 'vit gallout paeiñ hon implijad goude ma vo achu ar skoazell a-ratozh roet deomp get ar Rannvro. Ha derc'hel a raimp moarvat da ginnig paeiñ dre sammadoù izeloc'h, pe ur priz izeloc'h da vat evit ar re n'hellehe ket paeiñ ar sammad a-bezh.

Ampartiz ha darempredoù

Nebeutoc'h a 10 % ag ar respontourion o deus meneget un ampartiz a c'hellehent lakaat da dalvout evit ar Gerlenn. Ar soñj a-dreñv ar goulenn-se oa kerkoulz pediñ an dud da sikour buheziñ ar gevredigezh é kinnig oc'h ampartiz d'an izili arall ha klask tud a c'hellehe lakaat an ampartiz-se e servij ar Gerlenn en he maez hag en hec'h anv, da sikour hon kevredigezh da c'hounid argant. Daniel Carré a gont mod-se e brezhoneg 'ba'r skolioù ha paeet 'vez ar Gerlenn evit ar servij-se. Donet a ra deoc'h soñj ag un dra a c'hellehec'h gober er feson-se é lenn al linennoù-mañ ha n'ho peus ket skrivet er goulennaoueg ? N'eo ket re ziwezhat, èl rezon !

Tost 40 % ag ar respontourion a zo ezel ag ur gevredigezh arall é labourat àr tachenn sevenadur Breizh : 3 ag ar Gevrenn Alré hag 3 a zDeskamp ; 2 a zDiv Yezh, Diwan, Gevred. Ar c'hevredigezhioù arall a oa bet meneget ur wezh. Met dav eo lâret hon eus izili hag a zo ezel ag ur bochad kevredigezhioù ! Ag ar mediaioù (Radio Bro Gwened hag ar c'helaouennoù) betak kevredadoù bras (Deskiñ d'An Oadourien, Bodad ar Sonerien) dre gevredigezhioù sonerezh (lazioù-kanañ, bagadoù h. c'h.) pe yezh (Divskouarn, Sklêrijenn...), liammoù hon izili a zo liessort.

Ha pouezus int deomp : mod-se e c'hellomp bout doareioù ag ar bed sevenadurel a gemeromp perzh ennoñ, gouiet èl m'emañ an traoù e kevredigezhioù arall ha... brudiñ ivez hol labour ! Na zisoñjit ket eta kaozeal ag ar pezh a rit geneomp er c'hevredigezhioù arall hag ar c'hontrol ivez !

Tud arall

Evit achuiñ e felle deomp gouiet hag-eñ e ouie ar respontourion tud arall hag a vehe intereset get ar brezhoneg met na daont ket d'emezeliñ. 51,16 % anezhe o deus skrivet e ouient tud intereset, ha muioc'h c'hoazh a anave danvez deskidi (58,14 %) hag a chome hep donet.

A diouder a amzer a zo kaoz, èl rezon, hrevez 11 ag ar respontourion. C'hwec'h o deus respontet ivez e chome re bell an dud-se. Pevar o deus lâret e oa moarvat un diouder a c'hoant, lusk, kalon. Daou o deus tamallet an deverrañsoù arall hag unan an oad. Aze n'hellomp ket gober netra, èl lâret uheloc'h.

D'ar respontoù da heul e c'hellomp teurel muioc'h a evezh, avat : daou o deus lâret e c'helle bout a-gaoz d'an deizioù ha d'an eurioù ma veze lakaet ar c'hentelioù. Penaos e c'hellehemp lâret d'an dud-se : dait ar aok an distro-skol, lârit pegoulz e vezit dijapl hag e-menn, deomp da welet penaos e c'hellomp aozañ ar sizhuniad kentelioù evit plijout d'ar muiañ a dud ? Daoust ha gallout a raemp-ni lakaat ar benvegoù a faot evit meriñ ar sort aozadur ?

Pouezusoc'h c'hoazh, hrevez an niver a respontoù : pevar o deus skrivet ne dae ket an dud a-gaoz d'un diouder a vrudiñ, ha pevar arall o deus kavet e oa ar Gerlenn re serret àrni hec'h-unan hag e vanke d'an danvez deskidi-se anavout tud ag ar Gerlenn. Aze c'hoazh : penaos brudiñ gwell hon kevredigezh ha lakaat an izili da gaozeal ha da ginnig ar Gerlenn d'o darempredoù ?

Pennad-kloziñ

Gwelet a rit eta e ra ul **labour a-feson** Kerlenn Sten Kidna, hrevez hec'h izili o-unan, èl ma tiskouez an enklask diabarzh-mañ, met ivez hrevez ur bochad tud er-maez ag ar Gerlenn : an dud e karg er Rannvro hag e Ofis ar Brezhoneg, lakaomp, pe dilennidi, o deus bet tro da lâret deomp o soñj er c'heñver-se. A-feson eo, sur-mat, **a-drugarez d'hon implijad** ha d'al labour a ra bemdez evit ar skol-noz, met ivez evit *An Dasson* hag evit brudiñ ar gevredigezh. Pouezus eo eta ar post-labour. A-feson eo ivez **a-drugarez da lañs un nebeud tud a youl vat** (re ar c'huzul-meriñ hag ar gelennourion dreist pep tra) hag a ginnig kalzig a draoù, hag a dremen passapl a amzer é labourat evit ar Gerlenn.

Ma ouia eta izili ar c'huzul-meriñ emañ a-feson al labour lakaet da bal ar gevredigezh, da lâret eo difenn ha brudiñ yezh ha sevenadur ar vro, e chom daou du d'o frederi ur sort :

1. Penaos gober evit mirout ar post-labour ha derc'hel da baeiñ an implijad ?
2. Penaos aesaat al labour kaset a youl vat evit ma vo dalc'het dezhi get muioc'h a dud pe dud arall ?

D'ar goulenn kentañ e c'hellomp respont :

- kreskaat ar prizioù, displejus m'emañ ar feson-se d'ober ;
- ledanaat an niver a skolidi ha klask fesonioù arall, efedusoc'h c'hoazh, da gelenn ar yezh dezhe ;
- roiñ muioc'h a fiziañs dezhe 'vit ma kemerhent perzh e degouezhioù arall : mod-se e vrudint marse muioc'h ar Gerlenn ha tud nevez a c'hellehe donet da emezeliñ ha kemer perzh en degouezhioù-se, memmp ma n'int ket intereset get ar skol-noz ;
- lakaat labour ar Gerlenn (kaset get an implijad pe get izili a youl vat) da vout paeet get aozadurioù arall (skolioù, skolajoù, kevredigezhioù arall, gouelioù, tier-kêr, h. c'h.) ;
- gwerzhiñ muioc'h : brudiñ hag aesaat gwerzh ar produioù bet savet dija hag ijiniñ produioù nevez a galite (goude bout studiet pizh ar marc'had pe hrevez hon santadur, èl mard alie Steve Jobs ?!).

D'an eil :

- sevel binviji mererezh aes d'implijout get izili ar c'huzul-meriñ : mererezh ar gevredigezh, ar produioù ;
- ijiniñ frammoù da vroudiñ an eskemmoù, da zistouviñ al luskoù : eskemmoù soñjoù, c'hoantoù, kinnigoù... (dre Internet ?), hag a zay da vout degouezhioù gwirion nevez ha dedennus 'vit ar muiañ niver.

Setu : achu an enklask hag ar rentañ-kont anezhi ! Met e gwirionez emañ é krogiñ al labour 'vit ma kavhe izili hon kevredigezh ar muiañ a blijadur posubl e brezhoneg ! Hag afer 'vo ac'hanoc'h c'hoazh.

Trugarez da razh ar respontourion ha d'ar skipailh en deus graet al labour-mañ : Ronan Stéphan, Patrick Dréan, Daniel Carré, Ronan Postic.

David ar Rouz